

Dominique Dosch ed ils Sindorians

■ (anr/fa) **Als Dis da litteratura a Domat han ins pudì festivar sonda la vernissascha dal cudesch «Sindoria» da Dominique Dosch da Tinizong. Entschet ha la giuvna surmirana a scriver il cudesch avant trais onns.** Sindoria nun è ina persuna, mabain in mund parallel nua ch'ils Sindorians che abitan là tgiran in misteri grond e magic. La protagonista, la giuvna Ramona, sto fugir da la polizia. Sin la fugia emprenda ella ad enconuscher Aronel. Ensemen cun quest giuven attractiv e misterius passenta ella da tuttas sorts eveniments en il spazi tranter dus munds. «Il cudesch è fitg captivant, il lectur legia da l'emprima fin l'ultima pagina plain buonder», ha manegia *Chasper Pult*, il qual ha moderà la vernissascha da «Sindoria». Il cudesch è cumpari en la Chasa Editura Rumantscha. Sco che *Anita Capaul*, la manadra

da quella, ha ditg è in'incumbenza da mintga chasa editura era «da scuvrir giuvnas auturas ed auturs e da porscher ad els in accumpagnament durant lur emprims pass litterars e publicistics». Sco ch'ella ha ditg han duas personas lectorà il text da *Dominique Dosch*. L'autura, annada 1995, deriva da Tinizong. Suentar la scola secundara a Savognin ha ella entschet a Cuir a il gimnasi a la Scuola chantunala grischuna. A chasa discurra ella cun sia mamma tudestg ed ollandais, ma cun il bab sa senta ella da chasa «en il rumantsch surmiran». Pli baud ha ella scrit istorgias er en tudestg, «ma grazia a la concorrenza Plema d'aur hai jau survegnì pli e pli plaschair da scriver rumantsch». Sonda ha ella prelegì or da ses cudesch da bunamain 400 paginas ch'ella ha scrit il medem mument era sco lavur da matura.



La giuvna autura Dominique Dosch e Chasper Pult cun il cudesch gist cumpari «Sindoria».